

Família Saleziana, família mariana ida

Mensajen ba Família Saleziana – 5 Outubru 2013

Família Saleziana mak Família mariana ida (Karta identidade jkarizmátika).

Maria mak prezensa konstante iha Don Bosco nia vida no obra no referénsia espesiál ba Maria marka ho modu kle'an identidade karizmátika no espirituál grupu oioin Família nian.

Grupu sira Família Saleziana nian venera Maria Ausiliadora nu'udar sira-nia Patrona prinsipál no balun evidensia nia prezensa ho título oioin, atu subliña aspetu partikulár apostoladu rasik nian.

Maria la'ós de'it objetu venrasaun no kultu nian maibé pertense ba ita-nia identidade karizmátika. Hateten Família Saleziana katak hanoin ba Nia ne'ebé Inan, inspiradora, gia no prezensa ativa iha istória grupu ida-idak nian. Laiha família laho inan ida!

1. Ho Maria iha uma

Iha karta identidade Família Saleziana nian iha parágrafu ida (n. 11) ho título significativu liu: Ho Maria iha uma.

Espresaun ne'e fó hanoin pasajen Evanjellu João nian bainhira Jezús husi krús saran Maria ba João no entrega ita ba Maria, nia Inan (kf Jo 19, 26-27). Iha Jezús nia liafuan ba Maria no ba dixípulu João ita haree evidente prezensa no knaar formativu Maria nian iha Kreda no ba Kreda: "Na'i-Feto, ne'e mak ó-nia oan!" No ba João: "Ne'e mak ó-nia Inan!" (Jo 19, 27).

Maternidade foun Maria nian ida-ne'e mak "rezultadu husi domin foun ne'ebé sai tasak iha krús hun" (Redemptoris Mater 23).

Epizódiu daruak konklui nune'e: "No husi oras ne'e eskolante lori Maria ho naié" (Jo 19,27). No João simu Maria "entre nia sasán rasik", katak introdús nia iha ninia moris íntimu liu.

Maria konfia nia an ba nia no João konfia nia an ho fuan oan nian ba Maria ne'ebé fó hanoin ba nia kona-ba buat hotu Jezús dehan no halo.

Ne'e mak entrega an resíproku, ne'ebé kontinua ohin ih Kreda tanba ema ida-idak sai buras tuir maturidade Kristu nian.

«Espresaun "accepit eam in sua" [lori ho nia] nakonu ho signifíkadu: indika João nia desizaun atu halo Maria partisipa iha nia moris rasik, nune'e experimenta katak ema ne'ebé loke fuan ba Maria, iha realidade Maria mak simu nia no halo nia sai Ninian. Lema ne'ebé marka Papa João Paulo II nia pontifikadu, Totus tuus, sintetiza di'ak esperiénsia espirituál no mística ida-ne'e, vida ida orienta ho modu kompletu ba Kristu liuhusi Maria: "ad Iesum per Mariam"».

Ita mós nu'udar Família Saleziana simu Maria iha ita-nia moris, iha ita-nia comunidade edukativa sira no koko ninia prezensa moris. Ne'e mak "don ida grasa nian" prezensa Maria nian iha Kreda, iha Institutu relijiozu marianu oioin no ho modu espesiál iha ita-nia misaun saleziana. Ita mak loos duni "Maria nian tomak"! Nia simu ita nu'udar oan-feto no oan-mane no halo ita sai tasak nu'udar ema sarani, nu'udar ema konsagrada eh leigu empenhadu, nu'udar edukadór no edukadora sira. Nia, nu'udar Tulun, inspira no tahan ita-nia laran-manas apostóliku iha ita-nia dedikasaun ba misaun.

Nu'udar Inan, nia simu bolun atu eduka, atu halo sai nabilan nia oan-feto no mane ida-idak nia identidade kle'an ne'ebé Aman komunika, iha Kristu, liuhusi Espíritu Santu.

Ho ninia maternidade edukativa nia kontribui atu forma iha ida-idak Kristu nia ilas (kf Gal 4,19) ne'ebé marka iha ema hotu husi kedas kriaun.

Nu'udar inan no mestra, Virjen Maria inspira ita ho estilu ida moris sarani no religioza kontemporánea ho ita-nia tempu no tulun ita atu hetan lurón ne'ebé adekua liu atu sai sinál no espresaun Maromak nia domin preveniente ba foin-sa'e feto no mane sira.

Nune'e mak nia halo Don Bosco no nune'e mak nia kontinua halo ho ita. Nia kaer ita-nia liman no indika mai ita kampu iha-ne'e ita tenke serbisu bá. Maibé iha misaun ida-ne'e nia la husik ita mesak, bele dehan katak nia serbisu ho ita! No dala barak nia intervein ho modu estrordináriu, to'o halo Don Bosco hateten: «Ita devedór Maria nian iha buat hotu» no «ita-nia obra boot hotu iha inísiu no remata iha loron Imakulada nian».

2. Família ida ne'ebé Maria Imakulada no Ausiliadora mak gia

Imi hatene katak iha kakuluk Bazílika Maria Ausiliadora iha Torino iha estátua furak Imakulada nian. Iha liur Don Bosco hakarak koloka Imakulada no iha laran Maria Ausiliadora.

Obra saleziana hahú ho modu ofisiál iha festa Maria Imakulada nian iha 1841 no ba Don Bosco festa ne'e folin liu. Ita hanoin katak nia, hamutuk ho foin-sa'e sira iha Valdocco, moris ho entuziazmu klima ekleziál ne'ebé presede no akompaña proklamasun dogma Imakulada nian (1854) no ikusmai haree aparisaun iha Lourdes (1858). Nune'e, Oratóriu sai buras iha Maria Imakulada nia roman ne'ebé hamosu iha foin-sa'e sira empenú boot ida santidade nian. Natón de'it atu hanoin ba Domenico Savio no iha Mornese ba Maria Mazzarello no foin-sa'e dahuluk sira Asosiasaun “Filhas de Imaculada”.

Iha-ne' iha elementu fundamentál ida “sistema preventivu” nian: Imakulada la'ós de'it sinál pureza no santidade nian, maibé obra-prima pedagogia preveniente Maromak nian. Tanba nia tenke sai Maromak nia Inan, Nia halo Maria sai santa no sala-laek husi kedas nia sei iha knotak. Iha nia konsentra plenitude hotu gratuidade Maromak nia domin nian no plenitude resposta umana ba Maromak nia don. Iha nia ita kontempla Maromak nia grasa nia kmanek sira iha ema ne'ebé loke fuan ba nia ho dosilidade.

Ita-nia sistema edukativu karakteriza ho preventividade: ita hela iha labarik no foin-sa'e sira nia leet ho atensaun edukativa delikada. Ita hakarak atu buat aat la estraga sira, la halo aat ba sira-nia moris nia fafurak. Prevene signifika intervein tempu loos, molok buat aat tau abut kle'an demais iha foin-sa'e sira nia moris.

Hanesan Maromak prevene ninia kriatura ida-idak ho nia domin boot, hanesan ema ida-idak nia kreximentu tanba ita hakarak katak iha sira naksira iha ninia fafurak hotu Maromak nia ilas ne'ebé imprime iha sira husi kedas kriaun.

Iha Maria Imakulada mak nabilan plenitude umanidade ne'ebé hetan salvasaun ne'ebé dada foin-sa'e sira no sai tulun ba edukadór sira iha sira-nia misaun.

Se ita tama iha Bazílika boot dedka ba Maria Ausiliadora iha Torino, ita hetan Maria Ausiliadora ho Apostólu sira hale'u nia, nune'e nia mak Kreda nia Inan, Sarani sira nia Tulun, Liurai-Feto povu hotu nian.

Tanba sá mak Don Bosco dedika ninia Bazílika ba Ausiliadora se ba tinan barak iha Torino sira venera Maria Konsoladora [Consolata] no Maria Imakulada? Don Bosco rasik esplika: Presiza Maria Ausiliadora ba tempu difisil sira. Loron ida nia hateten ba padre Cagliero: «Na'i-Feto hakarak atu ita fó onra ba nia ho título Auxilium Christianorum: tempu ohin nian triste loos tan ne'e ita presiza tebes Virjen Santissima atu tulun ita konserva no defende fiar sarani» (MB VII, 334).

Don Bosco haree difikuldade boot sira ne'ebé Kreda hetan hasoru mundu, difikuldade sira iha família, iha obra edukativa sira, iha ema sira rasik nia dalan fiar nian no ho modu partikulár foin-sa'e sira-nian. Tanba ne'e nia sente urjénsia atu entrega ninia foin-sa'e sira ba tulun kbiit-na'in no maternu. No ida-ne'e nia haree iha Ausilaidora.

Maria sai Maromak nia tulun iha nia Oan-Mane nia Inkarnasaun no iha mundu nia salvasaun, tulun no edukadora Jezús nian iha nia kreximentu umanu, tulun iha primeira comunidade no tulun Kreda nian iha tempu sira liubá no iha istória. Liutiha Asunsaun ba Lalehan, nia la husik mesak nia oan sira, maibé tau matan ba sira no gia sira atu sai fiél ba beibeik ba Jezús.

Karizma salezianu hetan iha Maria, konsidera nu'udar Ausiliadora, ninia inspirasaun, ninia modelu.

* Don Bosco harii iha 1869 Assosiasaun devotu sira Maria Ausiliadora nian (ADMA), liga ho Santuáriu iha Torino, nu'udar sinál agradesimentu nian ba Na'i-Feto nia prezensa materna iha niia obra sira. Ohin loron ADMA habelar iha Nasaun 50 ho besik asosiasaun 600 agrega ba nia ne'ebé hala'o obra iha komuñau ho Kreda no ho grupu seluk Família Saleziana nian.

* Husi Maria Don Bosco simu inspirasaun atu funda Institutu FMA (1872) atu sai “monumentu moris ida” gratitudan nian ba Nia.

* Ba Maria Ausiliadora nia konfia Kooperadór Salezianu sira atu sira hetan iha nia protesaun no tulun iha sira-nia empenhu apostóliku iha sociedade no iha Kreda (1876);

Referénsia espesiál ba Maria «marka kle'an identidade karismátika no espíritual grupu oioin Família Saleziana nian ne'ebé mosu iha sékulu XX nia laran» (Karta identidade nian, n. 11). Grupu barak iha naran Maria Ausilaidora nian iha sira-nia denominasaun no esprime ninia prezensa ho título oioin atu subliña aspetu partikulár iha apostoladu rasik.

Maria hetan konsiderasaun la'ós de'it nu'udar Kreda nia Inan no Ausiliadora Sarani sira nian, maibé mós umanidade tomak nia Inan. Defaktu iha kolaboradór no kolaboradora barak Grupu oioin Famílai Saleziana nian husi relijiaun seluk ne'ebé iha devosaun sinsera ba Nia.

Don Bosco la hadomi de'it Maria Ausiliadora, maibé serbisu maka'as atu halo ema hadomi Nia. Eziste aliansa ida entre Maria Ausiliadora no Família Saleziana: Maria tulun ninia Família ne'e no dezenvolve ninia obra sira, habiit santidade no sasin sarani. Husi sira-nia parte membru hotu no grupu oioin Família Saleziana nian habelar kultu ba Ausiliadora.

Don Bosco hakerek iha Bazílika Torino nia oin eskrita ida: “Ne'e mak ha'u-nia uma, husi ne'e ha'u-nia glória”. Ita hanoin bá katak Bazilika moris nian mak ita!

3. Inan no Mestra fiar nian no saran-an iha ksolok

Iha Tinan Fiar nian Maria besik ba ita nu'udar matadalan no tulun iha dalan fiar nian. Mundu nia salvasaun liu husi feto-raan ida Nazaré nian nakloke ba grasa, nakonu ho Espíritu Santu, ne'ebé dehan “sin” ba Maromak nia projetu.

Iha ninia moris nia halo peregrinasaun fiar nian iha tatur Jezús nian no sai umanidade nia Inan.

Ita nu'udar Família Saleziana la harohan de'it Maria, ita venera nia ho forma devosional oioin, maibé ita hetan inspirasaun husi Nia atu sai sasin Evanjellu nian iha sociedade no Kreda ohin loron nian.

Iha Karta identidade Família aSaleziana nian iha parágrafu interesante ida (n. 37) ne'ebé apresenta Maria Ausiliadora Mestra espiritualidade apostólica nian.

Maria mak modelu no gia ba ita hotu iha misaun juveníl, populár no misionária (n. 16).

Iha tempu ida emerjénsia edukativa nian iha nivel hotu, forma ida aas liu solidariedade nian mak edukasaun. Hanesan Don Bosco hanorin ita, ita hotu tenke sente responsabilidade atu eduka labarik sira, menina no foin-sa'e sira nu'udar

sarani di'ak no sidadaun onestu". Ita hatene katak edukasaun mak dalan futuru nian, fatór progresu no transformasaun nian iha nivel umanu, sosiál, kulturál. Ohin loron laiha de'it pobreza ekonómika, maibé "pobreza espirituál" ida ne'ebé prosesu edulativu sira de'it mak bele rezolve.

Atensaun partikulár ida ita tenke fó ba família «fatin primáriu umanizasaun nian destina atu prepara foin-sa'e sira ba domin no akollimentu moris nian, eskola dahuluk solidariedade nian entre ema no povu sira» (n. 16).

Iha família mak prepara futuru humanidade nian. Iha nia ita hatene oinsá importante tebes prezensa no misaun feto nian. Sei iha lurón naruk atu halo atu valoriza jénio femininu iha kontestu no nivel hotu.

Esperiénsia saleziana moris no sai riku hodi kontribuisaun signifikativu no efikás feto barak nian. Don Bosco simu kontributu relevante ida husi Mamá Margherita iha elaborasaun Sistema Preventivu nian no iha realizasaun klima familia nian ne'ebé koko iha Valdocco (kf n. 8).

Maria, nia ne'ebé fiar, mak Inan nakloke iha saran-an iha ksolok. Nia hanorin ita atu tau matan ba ema sira ne'ebé entrega mai ita, atu tau matan ba detalhe sira. Iha Kaná ninia matan haree preokupasaun iha noivu sira nia oin no halo buat hotu atu husu Jezús halo milagre, hodi antisipa "oras" manifestasaun Oan nian: «Imi halo buat ne'ebé Nia hateten ba imi» - fó orden ba servente sira (Jo 2,5). Ne'e de'it mak liafuan, Evanjellu haktuir ne'ebé Jezús nia Inan hateten mai ita.

Maria la atua mesak. Nia envolve ema barak ne'ebé sai protagonista, orienta ba Jezús.

Ohin mós Maria la atua mesak atu sai "tulun", maibé hein ita-nia kolaborasaun atu lori esperansa ba mundu. Nia presiza Família Saleziana tomak atu kontinua sai Ausiliadora humanidade nian, inan fiar nian, edukadora no gia foin-sa'e no família sira-nian.

Hanesan Amu-Papa fó hanoin tempu ruma liubá: hotu-hotu iha Kreda simu bolun atu kolabora ba ema seluk nia kreximentu fiar nian, atu haklaken Evanjellu. No ida-nee mak mundu presiza liu ohin loron no kontinua hein. Maibé presiza atu ema ida-idak halo ninia parte. Ha'u propoin ba imi pergunta ne'ebé Amu-Papa halo iha Prasa S. Pedro kuarta 11 Setembru 2013: «Saida mak ha'u halo atu ema seluk bele fahe fiar sarani? Ha'u nia fiar sai fekundu eh ha'u taka an?». Ita hotu, defaktu, partisipa nu'udar Kreda no ho modu partikulár nu'udar Família Saleziana iha Kreda nia maternidade, iha Maria nia maternidade, atu Kristu nia roman to'o iha rai-ulun rai-ikun.

Iha momentu istóriku ita moria bá husu atu sai ema laran-manas ne'ebé, liuhusi fiar ida nabilan no moris nian, ita halo Maromak sai kredivel iha mundu ne'e. Ema ne'ebé nia matan hateke loos ba Maromak, aprende husi Nia humanidade loos. Hodi de'it ema sira ne'ebé Maromak kona mak Nia bele fila fali ba ema sira nia fuan».

Maria Ausiliadora haraik bensan mai ita no tulun ita iha dalan ne'e!